

Արձանագրություն

« ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿՈՏԱՅՔԻ ՄԱՐԶԻ ՀՐԱՋԴԱՆ ՀԱՄԱՅՆՔԻ 2025 -2027 ԹՎԱԿԱՆՆԵՐԻ ՄԻՋՆԱԺԱՄԿԵՏ ԾԱԽՍԵՐԻ ԾՐԱԳԻՐԸ ՀԱՍՏԱՏԵԼՈՒ ՄԱՍԻՆ» ՈՐՈՇՄԱՆ ՆԱԽԱԳԾԻ ՎԵՐԱԲԵՐՅԱԼ ՀԱՆՐԱՅԻՆ ՔՆՆԱՐԿՄԱՆ ՎԵՐԱԲԵՐՅԱԼ

27.06.2027թ., ք. Հրազդան

Սույն արձանագրությունը կազմվում է առ այն, որ 2024 թ. հունիսի 27-ին, ժամը 11:00-ին Հրազդանի համայնքապետարանի նիստերի դահլիճում տեղի ունեցավ «Հրազդան համայնքի 2025-2027 թվականների միջնաժամկետ ծախսերի ծրագրի մասին» որոշման նախագծի վերաբերյալ կազմակերպվող հանրային լսումներ:

Քննարկմանը մասնակցում էին՝

1. Հրազդանի համայնքապետարանի ներկայացուցիչներ
2. Բնակիչներ

Թվով՝ 15 հոգի:

Համայնքապետարանի աշխատակազմի Ֆինանսատնտեսագիտական բաժնի պետ Արևիկ Եփրեմյանը ներկայացրեց «Հրազդան համայնքի 2025-2027 թվականների միջնաժամկետ ծախսերի ծրագրի մասին» որոշման նախագիծը:

Համաձայն «Հայաստանի Հանրապետության բյուջետային համակարգի մասին» օրենքի 31-րդ հոդվածի 1-ին մասի 1.8-րդ կետի, համայնքի ղեկավարը կազմում և համայնքի ավագանու հաստատմանն է ներկայացնում համայնքի 2025-2027 թթ. միջնաժամկետ ծախսերի ծրագրի (այսուհետ՝ ՄԺԾԾ) նախագիծը: Հրազդան համայնքի 2025-2027 թթ. միջնաժամկետ ծախսերի ծրագիրը հաստատելու մասին Հրազդան համայնքի ավագանու որոշման նախագիծը մշակվել է «Տեղական ինքնակառավարման մասին» և «Հայաստանի Հանրապետության բյուջետային համակարգի մասին» օրենքների պահանջներին համապատասխան:

2025-2027 թթ. միջնաժամկետ ծախսերի ծրագիրը, լինելով համայնքի եկամուտների ձևավորման ու ծախսերի կատարման տարեկան ֆինանսական ծրագրերի ուղենիշային փաստաթուղթ, ուղղվում է տեղական ինքնակառավարման մարմիններին օրենքով վերապահված լիազորությունների շրջանակներում համայնքային ծրագրերի իրականացմանը: «Հայաստանի Հանրապետության Կոտայքի մարզի Հրազդան համայնքի 2025-2027 թվականների միջնաժամկետ ծախսերի ծրագրի հաստատելու մասին» համայնքի ավագանու որոշման նախագիծը ընդունելու արդյունքում ակնկալվում է եկամուտների և ծախսերի արդյունավետ կառավարում: Համայնքի միջնաժամկետ ծախսերի ծրագիրը համայնքի հնգամյա զարգացման ծրագրի դրույթների իրագործման հիմնական

գործիքն է, որը հնարավորություն է տալիս առավել իրատեսական և առարկայական դարձնել նախատեսվող ծրագրերը: Այն հստակեցնում է եռամյա ժամանակահատվածում համայնքի ծախսային քաղաքականությունը տարեկան կտրվածքով՝ հնարավորություն տալով համայնքի համար միջնաժամկետ հատվածում կառավարելու համայնքի ֆինանսական ռեսուրսները և ստեղծելու պատշաճ ծրագրային հիմքեր առաջիկա տարվա համայնքի բյուջեի նախագծի մշակման համար: Համայնքային ոլորտային գերակայությունները որոշվում են ինչպես համայնքների զարգացման հնգամյա ծրագրերի գերակայությունների, այնպես էլ ՀՀ կառավարության ծրագրերի առաջնահերթ ուղղությունների հիման վրա: Արևիկ Եփրեմյանը նշեց, որ նախագիծը մշակելիս կարևորվել է մշակույթի տների, գրադարանների, երաժշտական դպրոցների աշխատողների աշխատավարձերի բարձրացումը, շարունակվում են համայնքային ենթակայության հուշարձանների վերականգնման և պահպանման աշխատանքները, ճանապարհային տնտեսության, առևտրի և տնտեսական զարգացման, քաղաքաշինության, անշարժ գույքի կադաստրի, գյուղատնտեսության և ջրային տնտեսության, էներգետիկայի և բնապահպանության ոլորտներում տարվող աշխատանքները, բազմաբնակարան շենքերի սպասարկման, վթարային շենքերի գույքագրման ու ամրացմանն ուղղված ծրագրերի մշակման, նոր շենքերի կառուցման, ապօրինի շինությունների քանդմանն ուղղված միջոցառումների իրականացումը:

Ներկայացվեց ՄԺԾԾ հիմնական նպատակը, որն է՝ ներկայացնել համայնքի եկամուտների հավաքագրման ռազմավարությունը, հաջորդ երեք տարվա բյուջեի ծախսային ծրագրերը:

Համայնքի ՄԺԾԾ-ն բաղկացած է երկու մասից՝

1. համայնքի եկամուտները շարադրող մաս,
2. համայնքի՝ հնգամյա զարգացման ծրագրից բխող ծախսային քաղաքականությունը շարադրող մաս:

Մանրամասն ներկայացվեց 2025- 2027թթ եկամտային ու ծախսային կանխատեսումները, նախատեսվող սուբվենցիոն ծրագրերը:

Հնչեցին հարցեր:

1. Աղբահանության մասով պլանավորված ֆինանսական միջոցների վերաբերյալ՝ սակագինը մնացել է նույնը, թե հաշվի է առնվել Կոտայքի և Գեղարքունիքի մարզերի կոշտ կենցաղային թափոնների աղբավայրի շահագործման արդյունքում հաշվարկված սակագնային փոփոխությունները:

Հարցին ի պատասխան նշվեց՝ քանի որ աղբավայրը շահագործման չի հանձնվել, սակագնային փոփոխություններ դեռևս չկան, լինելու դեպքում բյուջեում կկատարվեն համապատասխան փոփոխությունները:

2. Երիտասարդական ծրագրերի վերաբերյալ ինչպիսի ծրագրեր ու նախագծեր են նախատեսվում:

Հարցին ի պատասխան՝ ներկայացվեց հանրային մասնակցության բարձրացման մասով նախատեսվող միջոցառումները, որոնցում ակնկալվում է երիտասարդների ներգրավվածությունը: Համայնքի ենթակայության մշակույթի և արվեստի դպրոցների, սպորտդպրոցների կողմից պարբերաբար կազմակերպվում են տարաբնույթ միջոցառումներ, քաղաքի տոնի կապակցությամբ ամեն տարի նախատեսվում են տարաբնույթ միջոցառումներ համայնքի տարբեր թաղամասերում, ինչպես նաև ամեն տարի բյուջեով նախատեսվում են հասարակական կազմակերպություններին աջակցելու նպատակով ֆինանսական միջոցներ:

Հարց-առաջարկ եղավ հանրային մասնակցության, իրազեկվածության բարձրացման նպատակով կիրառել լրացուցիչ գործիքներ, որպեսզի համայնքի բնակիչներն ակտիվ մասնակցություն ունենան համայնքի զարգացմանը: